

Herbstweekend vo dä Frauä

Am 8.10 händ sich 8 Frauä am Bahnhof troffe. Niemert ussert d'Doris und d'Fränzi hät gwüsst wos hi gaht. Am 8.23 simmer in Zug nach Basel igstiige und händ als erschts grad än Kafi und äs Gipfeli id Händ druckt übercho. Mhhh!!! Isch fein gsi. Ca. ä Stund spöter sind mir tatsächlich in Basel usgstiige. Hmm? Wohere gahts ächt jetzt? Zerscht id Gepäckufbewahrig häts gheisse. Gschnäll isch alles verstaht gsi und los gahts. Ab ufs Tram und dänn umstiige uf de Bus. In Prattelä sind mir vor de Schwiizer Salnie gstande. Det hät euis än nette Herr (dä Name hani leider vergässe) empfangen. Er hät euis alles über die Saline verzelt und äxtra für euis hät er no s'lädeli ufgmacht und die meischte händ au no öpis poschtet.

Nachdem Rundgang sind mir wiider zrugge nach Basel gfare. A de Bushaltstell hät jede äs Couvert über cho. Si sind vo 1-7 nummeriert gsi. S'erschte Couvert hät für jede äs ÖV-Billett drinne gha und s'zweite hät euis zumä goldige Dach verwise. Hei! Wie findet mir das jetzt use wo das isch? Äs goldigs Dach? Gli händ mir mit Hilf vo eusne Handys usegfunde, dass es keis goldigs Dach isch sondern äs goldigs Türmli. Und wo isch das Türmli? Ja richtig! Natürlich ufem Rathaus. Nur wo und wie fahred jetzt die cheibe Tram? Äs hät e Baustell geh, ich glaub die hät sich über die ganz Innestadt usbreitet und äs isch keis Tram gfare wies het söllä. Darum händ mir eifach d'Füäss under d'Ärm gno.

Acho bim Türmli häts au scho dä erschte Apéro geh und s'Couvert 3 isch göffnet worde. Äs Chrüzworträtsel mit än hufe Frage über dä Turnverein. Mit Bravour händ mir das glöst und dänn au gwüsst wo dass es öpis z'ässä git. Hmm? Aber wie um gotteswill chömed mer jetzt det wieder here? Aso sicher isch, nöd mit äm Tram. Mit dä Füäss sind mir i de Markthalle acho. Äs isch än Multi-Kulti Ässpalascht gsi. Äs hät us allne Länder öpis geh. Fascht alli händ öpis gfunde und so händ mir s'Couvert 4 ufta. Das hetti euis zum Spahlen-Tor söllä füähre aber uf Grund vo dä Tram Situation händ mir das usglah und sind diräkt zum Münster und vo det zum Tinguely-Brunne. Die letschti Station wäri än Apéro id Bar Rouge ufem Messe-Tower gsi. Da Ziit aber scho fortgschritte gsi isch, sind mir über dä Bahnhof is Hotel.

S'Hüngerli hät sich au scho wiider ächli breit gmacht. Äs feins Nachtässä händ mir im Restaurant der vierte König igno. Dä Abig isch no früh gsi und so händ mir euis entschlosse ufem Messe-Tower no än Schlummi go zneh. Am lgang händs euis gseit, dass abem zähni Club-Betrieb seg und dass es dänn ächli luut sig. Das hät euis nöd zrugghalte und wo mir no ghört händ, dass es ab 35gi gratis isch erscht rächt nöd. Hi hi hi...! Es hät nur öpert müsse zahle, aber da händ mir a de Kasse eifach ächli eso ta, als ob mir nöd wüsstet ob mer söllted oder nöd und so hät Tina am Schluss au gratis ine chöne. D'Ussicht vo det obe isch schön gsi und d'Musig isch voll im erträgliche Bereich gsi. Fascht alli händ sogar no s'Tanzbei gschwunge. Brav sind mir natürlich bi Ziite is Bett, will mir händ ja nöd gwüsst was am nöchschte Tag alles passiert?

Usgschlafe und guät verpflegt sind mir wider losmarschieret. S'Gepäck händ mir im Hotel dörfe stahlah. De Peter hät's für euis abholt und diräkt uf Dietike bracht. Nach ärä Tramfahrt durs judihui (aso laufe wäri schnäller gsi) und ämänä churze Marsch simmer i dä Basler Papiermühli acho. Au dete sind mir vom nette Herr (au de Name weisi nömä) durs Museum gführt worde. Sogar sälber Papier händ mir gmacht. Händ ihr gwüsst, dass mer ganz frühner Papier us alte Hudle und nöd us Holz gmacht hät? Es isch ä langi aber ä sehr interssanti Füährig gsi. Zur stärichig sind mir grad um de Egge is Resti und händ sehr fein gässä. Irgendwänn häts gheisse, dass mir euis langsam söllted parat mache, es gaht wiiter. Nur was mached mer ächt no? Mir sind da grad diräkt am Rhii. Mir gönd sicher ufs Schiff? Aber sicher sind mir glich nöd. Im Schnäggetempo sind mir wider richtig Innestadt glofe, dänn hät d'Fränzi welle es Foti mach. Es isch im Fall nöd s'erschte gsi! hi hi hi....! Churz drufabe häts dänn gheisse, mir gönd ufs Schiff und fahred Richtig Rhiifälde. Es müänd zwei Schlüsse überwunde werde. Guät zweiehalb Stund isch d'Fahrt gange. Isch imposand gsi zuäzuluäge wie das mit dene Schlüsene funktioniert hät. In Riifälde sind mir dänn nochli durs Städli gschländert und händ alli Lädä wo offe gha händ in Beschlag gno. Isch herrlich gsi. Zum Abschluss

händ mir dänn no äs Glace innere herzige Gelateria gässä und dänn häts scho wiider gheisse dä Zug fahrt am 18.49 richtig Dietike.

Äs isch äs tolls Weekend gsi und ihr glaubeds nöd, die acht Frauä händ immer öpis z'schwätze gwusst! Liebi Doris, liebi Fränzi danke villmal fürs Organisiere es isch än riise Chrampf gsi aber mir händs gnosse.

Gaby Baumberger

